

mer sicherheit, so habin wir alle vnsir ingesegil mit vnsirm guten willen vnd wissen an disen brif lasen hengin, der gegeben ist noch Cristi gebort virczen hundirt iar, dar noch yn dem czenden iare an sente Bartholomeus abunde dez heiligen zcwelfboten.

Nach dem Orig. im K. Haupt-Staatsarchiv zu Dresden mit vier Siegeln der v. Schleinitz an Pergamentstreifen; das fünfte ist abhanden gekommen.

No. 252. 1410. 23. Aug.

*Probst und Convent versprechen die Stiftung der Brüder von Schleinitz (No. 251) gewissenhaft zu vollziehen.*

Wir Jurge Eckilman probist, Johannes Dere prior vnd dy gancze samenunge des closters sente Affren zcu Misen ordins vnd regil sente Augustini bekennen —, alz der erwirdige herre er Johannes von Slinicz probist zcu Budissen vnd thumherre zcu Missen, Heinrich, Hugolt vnd Hans syne gebrudere do selbins zcu Slinicz gesessen, mit wolbedochtem müte vnd gutem rate irer frunde vnd nemlichin mit willen vnd wissen ern Hugoldis von Slinicz ires vettern zcu Serhusen gesessen, eyn ewig gedechtenisse seilgerethe vnd iargeczit Jane irem vater, Margarethen irre mutir syner ersten wirtinnen seligis gedechtenis, vnd frawen Elizabeth des selbigen Jans ouch eliche wirtinne vnd mutir der obegenanten von Slinicz, die noch lebet, das lebin ir der almechtige got ghenediclich lenge, in vnsirm clostir ierlichin gemacht vnd bestalt haben, dorvmb sie vns allen vnsirn nochkomen zcu gebüde vnd zcu der fabriken vnsirs clostirs zewe schog grosschen acht heller gutir Fribergischer munczen, zehen huner, vunf vnd achezig eyr, ierlichis czinses in den dorfe vnd velde Priwer uff zewen erben gegeben vnd sich der vorzeggen haben, alz ir briff den sie vns dorobir gegeben habin vswiset, vnd wy wir das selbige selgerethe vnd uff welche czit des iares halden, vnd das gelt, huner vnd eyir die sy dar zcu bescheiden vnd gegeben habin, vndir vns teilen sullen, noch lute des selbigen hoptbrifes uswisunge, so globen wir vorgebanten .. probist .. prior vnd dy gancze sammunge vor vns vnde alle vnsern nachkomen, das selbige egnante selgerethe, iargeczit vnd gedechtenis yn allirwise ewielich ierlich vnd redlich an allen stucken, artikeln vnd noch uswisunge des egnanten brifes zcu halden vnd zcu vulczihen an allen ufczock, sumenis vnd hindernis, bie vnsirn truwen vnd gewissen ane arg. Des zcu orkunde — gegeben nach Cristi gebort virczenhundirt iar dar noch yn dem czenden iare an sente Bartholomeus abunde des heiligin zcwelfboten.

Nach dem Orig. im K. Haupt-Staatsarchiv zu Dresden mit dem Siegel des Probsts und des Capitels an Pergamentstreifen.